



Broj: 02-04-1220/21

Datum, 04.01.2022. godine

ZAPISNIK sa 12. redovne sjednice 7. saziva Općinskog vijeća Doboj Istok

Dvanaesta redovna sjednica 7. saziva Općinskog vijeća održana je dana 30.12.2021. godine u zgradi općine Doboj Istok u Klokočnici sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i finansije, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu i Sulejman Delić, pomoćnik općinskog načelnika za civilnu zaštitu.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvaženi načelnice sa saradnicima, kolege i kolegice vijećnici, esalamu alejkum i dobar dan. Otvaram 12. redovnu sjednicu 7. saziva Općinskog vijeća Doboj Istok. Molim tehničkog sekretara da utvrdi broj prisutnih na današnjoj sjednici. Znači, prisutno je 16 vijećnika, Zerina Subašić je najavila da će malo kasniti.“

USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste zapisnik sa prethodne sjednice. Ima li neko primjedbu? Nema. Ko je za usvajanje zapisnika? “

Glasanje: ZA – 16, PROTIV – 0, UZDRŽANIH – 0 (Zerina Subašić je trenutno odsutna).

VIJEĆNIČKA PITANJA

Selmin Karić, predsjedavajući Općinskog vijeća: „ Ima li neko pripremljeno vijećničko pitanje? Nema.“

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju 12. redovnu sjednicu 7. saziva Općinskog vijeća Doboj Istok predviđen je sljedeći dnevni red:

1. Razmatranje i usvajanje Prijedloga Rebalansa Budžeta općine Doboj Istok za 2021. godinu
2. Razmatranje i usvajanje prijedloga Odluke o imenovanju Općinskog pravobranioca u Zajedničkom pravobranilaštvu za općine Čelić i Doboj Istok
3. Razmatranje i usvajanje prijedloga Odluke o prenosu prava vlasništva stalnih sredstava
4. Razmatranje i usvajanje prijedloga Odluke o nabavci stalnih sredstava i opreme za strukture civilne zaštite općine Doboj Istok
5. Razmatranje i usvajanje prijedloga Odluke o gubitku statusa javnog dobra u Lukavici Rijeci,
6. Razmatranje i usvajanje prijedloga Odluke o naknadama za rad u Općinskom vijeću Doboj Istok,
7. Razmatranje i usvajanje Prijedloga Budžeta općine Doboj Istok za 2022. godinu
8. Razmatranje i usvajanje Prijedloga Odluke o izvršenju Budžeta općine Doboj Istok za 2022. godinu
9. Razmatranje i usvajanje Prijedloga Programa rada Općinskog vijeća Doboj Istok za 2022. godinu,
10. Razmatranje i usvajanje Programa i plana rada Općinskog načelnika za 2022. godinu.

Dnevni red dajem na diskusiju. Ima li prijavljenih? Nema. Ko je za ovakav dnevni red?

Glasanje: ZA – 16, PROTIV – 0, SUZDRŽANIH – 0 (Zerina Subašić je trenutno odsutna).

REALIZACIJA DNEVNOG REDA

1. Razmatranje i usvajanje Prijedloga Rebalansa Budžeta općine Doboj Istok za 2021. godinu

Selmin Karić, predsjedavajući Općinskog vijeća: „Tačku dajem na diskusiju. Komisija za budžet i finansije nije održala sastanak, jer nije bilo kvoruma, tako da nemamo mišljenje Komisije.“

Mehmed Mehinović, vijećnik SBiH: „Gospodine predsjedavajući, zamjeniče predsjedavajućeg, kolege i kolegice i ostali prisutni, esalamu alejkum i dobar dan i naravno želim vam uspješan rad. Nećete mi zamjeriti, predsjedavajući, da iskoristim priliku da svima prisutnima ovdje poželim svu sreću u Novoj godini, vama i vašim porodicama i da se sve želje ostvare i ono što je najbolje, a pogotovo brdo zdravlja da bude. Što se tiče tačke dnevnog reda moja diskusija o Rebalansu budžeta neće biti političke naravi i iz diskusije neće se moći zaključiti da li pripadam opoziciji ili poziciji nego jednostavno jednog profesionalca kako vidi ovaj finansijski dokumenat koji se pravi. U principu ljudi koji su radili sa mnom znaju da ja nisam pristalica rebalansa budžeta. Nisam iz određenih razloga, pogotovo ako se pravi u decembru, jer mi to dođe kao peglanje nekih stvari i da ne bude u izvještaju o izvršenju budžeta nekih Bog zna odstupanja. Ali evo ta kategorija se koristi, mnogi je koriste i rade rebalans i moram reći da je bilo razloga da se ovaj rebalans uradi. Da li je trebalo ranije ili nije, to ja neću da kažem. Međutim mislim da ga je trebalo uraditi, jer u globalu nije bilo odstupanja, međutim unutar u sistemu planiranog budžeta bilo je odstupanja i trebalo je neke stvari da se pojasne u većem iznosu. Mi svi znamo otprilike šta je pojam rebalansa budžeta, da je to uravnoteženje prihoda i rashoda ako je došlo do nepredviđenih prihoda u budžetu. Kada se usvoji rebalans budžeta on postaje budžet i faktički mi pričamo sada o budžetu, ako se usvoji, a usvojiti će se vjerovatno. Kada sam rekao da je došlo do odstupanja i da je bilo razloga da se napravi ovaj rebalans vidjet ćete, ko se bavio analizom i strukturom rebalansa budžeta, da je potpora manja za nekih 550.000, prihodi od viših nivoa vlasti, da su porezi i doprinosi rasli za 500.000 KM i takse za 45.000 KM. Ja obično znam reći da hrabre prati sreća. Ovo da je neko štimao na neki način i da je frizirao stvari ne bi mogao ovako pogoditi da se manjak određenih prihoda i višak određenih prihoda poklopio u nekoliko hiljada. Zaista nevjerojatno. Iz tih razloga govorim da je trebalo sve posložiti kao treba. Rekoh hrabre prati sreća, jer je bio hrabar budžet i kada sam pričao o budžetu rekao sam da je hrabro postavljen budžet, međutim izgleda da će biti ostvaren i prebačen. Kada se pogleda malo struktura rebalansa budžeta, o čemu ja hoću nešto da kažem, jeste da je on koliko je planiran od 3.671.000 cirka, da ne pominjem dalje i u strukturi budžeta porezi i doprinosi iznose 64% budžeta. Ko može pratiti nije loše da se zna. Takse su 483.000 ili 14% budžeta i 22% ili 820.000 dotacije sa viših nivoa vlasti. Ako uzmemo da su tekući izdaci 2.557.000 ili 70%, a to je ono da općina ima troškove i plaće i transfere nižim nivoima vlasti i 30% ili 1.134.000 KM otprilike kapitalni izdaci što je jako dobro u strukturi. 734.000 je došlo od viših nivoa vlasti, a vlastitih sredstava je negdje oko 400.000 otišlo u kapitalne izdatke. Znači, da nisu rasli ovi doprinosi ne bi imali ovakvu situaciju da se ulaže iz vlastitih sredstava u ove kapitalne izdatke. Šta je ovdje još što je jako dobro? Ko me je pratio porezi i takse iznose zajedno 78%, a tekući izdaci 70%. Općina je znači samoodrživa i općina je kadar da isfinansira sve svoje troškove i da ostane dio para što je jako dobro u ovom rebalansu. Ne treba žmiriti na određene stvari i određene stvari moraju se reći. Ja pratim budžet od 1998. godine kada je bio 460 i 600.000 i ovakva struktura nikada do ovog rebalansa nije bila da vlastiti prihodi mogu tekuće izdatke da nadmaše i to u značajnom iznosu i to je ono što je dobro. Htio sam da prokomentarišem malo, a to me je i ponukalo da malo prokomentarišem ovaj rebalans budžeta – prihodi. Vidio sam po rebalansu da su prihodi po rebalansu veći za cirka 500.000 KM. Izgleda da je teško bilo isplanirati i višim nivoima vlasti, pratim kako je u Federaciji i kantonu, jer je očito da se probudila privreda što je poslije pandemije skočilo i da dijaspora nije postala dijaspora novčanih doznaka nego dijaspora investicionih ulaganja. To se osjetilo na svim nivoima vlasti po rastu poreza i indirektnih poreza što je jako dobro, jer je prethodna godina bila jako loša zbog pandemije. Ja ću krenuti od konta 716115 prihodi od poreza dohotka od fizičkih lica za dobitke od igara na sreću. To je po redu kako je po kontnom planu i nisam to stavio na prvo mjesto o čemu hoću da diskutujem. Plan je bio 26.200, a po Rebalansu je povećan za 36.800 ili ukupno 63.000 ili 240 % rasta tih prihoda. Trebalo bi reći mašala rasli prihodi, međutim jedne prilike sam za ovom govornicom govorio i hoću opet da kažem, da je ovo jako problematično i da je od naših građana, jer kada se to preračuna kladionica je naplatila oko 750.000 KM na općini Doboj Istok. To je skoro 1/3 našeg realnog budžeta, a možete zamisliti ko sve kidiše na budžet počevši od ovih redovnih stvari od rada organa uprave i rada Općinskog vijeća, pa sporta, kulture, boračkih organizacija, Dječijeg obdaništa, Centra za socijalni rad itd. A evo zbog naših

sugrađana određenih kategorija rasli su prihodi po tom osnovu za skoro 240%. Ovo je samo moj komentar dobronamjeran, ali je i dobro za neku sociološku analizu, da neki ljudi to iskoriste i malo to pogledaju, pa kada se daju neke jednokratne pomoći, ako ništa, da se snimi ko se to kladi i na koji način i da li treba svakome dati tu socijalnu pomoć ili ne treba. Konto 717141 i to su prihodi od indirektnih poreza i to je ovo o čemu sam pričao da je privreda probuđena, da nam ni federalno ni kantonalno ministarstvo finansija nisu mogli predvidjeti koliki će biti prihodi, pa skoro 13 – 14% i da su rasli skoro za 130.000 u odnosu na planirano kako su oni projektovali. To je dobro i ovo što sam rekao dijaspora postaje dijaspora ne doznaka, nego dijaspora kapitala, privreda se probudila i zato imamo ovakvu situaciju kakvu imamo. Nije malan iznos od 130.000 povećanja i to je jako dobro. Konto 722516 naknade za vršenje usluga iz oblasti premjera katastra nekretnina. Plan je bio 30.000, a rebalansom je povećan za 14.044, povećanje 46%. Ovo sam naveo iz razloga, jer je to jako dobro i htio sam za ovom govornicom u svoje ime, pa možda i vaše, da pohvalim ljude koji su radili u ovoj službi. Očito je da su imali posla i to je prihod općine koji je zarađen, otprilike i želim sa ovog mjesta da im čestitam i da im odam priznanje. Ovo je možda i bolje od nekih drugih prihoda koji su rasli, jer su baš zarađeni određenim angažmanom nekih ljudi i ja im želim da čestitam. Klasa 8. ja neću da je komentarišem iz razloga što je smanjen broj prihoda za skoro 550.000, a vjerovatno imaju određeni razlozi zbog čega je to, jer to se uvijek dešava, a zavisi od političke situacije, od političkih gibanja na političkoj sceni u općini Doboj Istok. Naravno klasa 6. ona po broju treba biti prva, međutim ja uvijek govorim prvo o prihodima, pa onda o rashodima iz razloga što ne možeš ništa ni dijeliti ako nemaš prihoda. Konto 613914 bit će nekome možda i smiješno, ali sam namjerno ovo stavio i hoću malo da kritikujem i Općinsko vijeće, reprezentacija. Ja nisam nikada protiv reprezentacije, jer ona je mala, zaista mala i ostvarena, ali Općinsko vijeće je prebacilo reprezentaciju za 66%. U apsolutnom iznosu ovo je sasvim malo, međutim kada bude neko gledao, a ja znam profesionalno kako je to i zbog čega je to. Vjerovatno je neka proslava knjižena i nije dobro planirano i opet gledano manje je planirano u budžetu nego što je ovo bilo. Nije dobro da se dešava, ne znam koji je razlog i nije apsolutno ništa, jer je reprezentacija u Općini za pohvaliti. Znam da to nije nikome drago, pa ili smo loše isplanirali ili se nešto desilo što nije dobro i po meni nije trebao da bude ovakav skok od 66% povećanje za Općinsko vijeće, a ne govorim o izvršnom organu. Konto 613991 ostale nepomenute usluge ili dadžbine. Planirano 31.800, rebalansom povećano za 130.000 i sada iznosi u planu 161.800 ili u relativnom iznosu 508 % povećanja 5 puta. Ja mislim, o čemu sam stalno govorio sa kolegom rahmetli Safetom Smajilbašićem, da je bilo dobrih budžeta i bilo je dobrih izvještaja, ali nismo mogli glasati iz razloga što se ne pojasne neke stvari. Ovo je jedna od stvari koju je trebalo pojasniti. Ne sumnjam da se desilo nešto nepredviđeno i da je to otišlo tamo gdje treba, međutim zar ne treba reći gdje je to 508 indeks. Obično u finansijama ima jedno pravilo da se nešto ako je manje od plana 10% ili više od plana 10% da se pojasni makar jednom rečenicom, a ovdje nije pojašnjeno i ja sada mogu nagađati šta je to. Znači, povećanje 508%, nema obrazloženja, a vjerujem da je sve ok. Konto 614324-7 Udruženje građana Sportski savez, rebalansom je povećan za 6% ili 10% i ovo sam kao i katastar nekretnina htio da pohvalim što izvršni organ prati Sportski savez, što doznake liježu redovno, a to se vidi kroz izvještaj, a vidim hvale se i klubovi, svi klubovi, ne govorim samo za nogometni, to je dobra stvar i apsolutno ovo podržavam. Takođe 614329 kulturne i sportske manifestacije su povećane za 45% i za to uvijek treba biti mjesta, međutim treba i realno planirati da bude dobro. Možda i povećati plan za naredni period na ovom kontu, jer nikada nije dosta kulturnih i sportskih manifestacija da građani vide da nije sve sumorno, da se dešavaju neke stvari od promocije knjiga, kulturnih društava i njihovih proslava itd. Kako sam rekao na početku svog izlaganja rebalans je bio potreban da se posloži sve ovo i drago mi je da je iz poreza otprilike oko 400.000 otišlo u kapitalne izdatke. Nažalost ni ovdje u rebalansu ne znamo šta je to urađeno, da li građevine, mostovi, ne znamo gdje je i šta je da bi mogli građanima i mi reći evo napravili smo to, uradili smo to itd. Ja sam sretan što u strukturi prvi puta imamo veće vlastite prihode u odnosu na donacije i dotacije viših novoa vlasti i da možemo pokriti tekuće izdatke u budžetu u odnosu na sve ostalo. Ja bih ovaj naš budžet ocijenio, bez obzira što nije rastao u globalu, nego je unutar presložen i ocijenio bih ga jednom visokom ocjenom samo da mu se doda još ovih nekoliko obrazloženja šta je to i gdje je to. Ništa ne bih kritikovao, ništa ne bih dodao i mislim da, a bit će prilike da diskutujem i o budžetu, nekada nije dobar budžet ako je visok i ako je 5 miliona, a nema ovakvu strukturu, jer to je sigurnije za opstanak općine i ovo se cijeni kao sigurnost jedne lokalne zajednice. Naravno bez zaduženja i bez nekih kreditnih sredstava općina traje nekih 23 godine što mene posebno raduje, a bit ćemo u prilici da se možda nekada za nešto zadužimo zbog nekog kapitalnog izdatka. Ocjenjujem visokom ocjenom ovaj rebalans budžeta i nadam se da će u narednom periodu biti još bolje.“

Zerina Subašić je stigla na sjednicu.

Emira Karić, predsjednica kluba vijećnika SDP: „Gospodine načelnice, kolege vijećnici i ostali želim da vas srdačno pozdravim i takođe da vama i svim građanima zaželim uspješnu i sretnu 2022. godinu i da bude bar nešto bolja u odnosu na 2021. godinu u mnogim segmentima života. Što se tiče ove tačke dnevnog reda ja ću se itekako osvrnuti na, da kažem, predavanje kolege Mehmeda. Mogu slobodno reći da me vaše predavanje podsjetilo na vrstu heurističke nastave nakon koje nastavnik kada vodi djecu kroz čas, djeca na kraju časa moraju reći aha ili eureka. Tako sam i ja za mnoge stvari, iako sam ovdje fini broj godina, za mnoga konta danas rekla aha, razumjela sam šta ste govorili. Međutim ja očekujem od nekih drugih osoba, pa na kraju krajeva da to bude u stavu komisije, da to bude diskusija i samog gospodina načelnika ili službe. Oni se mogu nadovezati poslije vas i to nije problem, ali u svakom slučaju hvala vam na ovim objašnjenjima. Ja i dalje stojim da su mi potpuna nepoznanica određena konta u ovom budžetu, u ovom slučaju rebalansu budžeta i ja sam zato postavljala i vijećnička pitanja. Ja vam moram predsjedavajući reći da je vaša dužnost da znate da niste odgovorili na neka vijećnička pitanja i takođe vam moram reći da niste pratili realizaciju određenih vijećničkih inicijativa. U pitanju je saobraćajno ogledalo i da ne obavještavate vijećnike dokle je došla realizacija, jer do realizacije nije došlo, što vidimo i sami na terenu. Smatram da su to krucijalne stvari koje predsjedavajući mora da nosi na svojim leđima. Ja bih poslije ove jako dobre diskusije samo postavila pitanje vezano za potporu. Znači ovdje je planirano 500.000, u rebalansu je minus 200 kada je u pitanju potpora viših nivoa vlasti Federacija Bosne i Hercegovine i takođe imamo 750 potpora od TK, odnosno minus 304 koliko ja ovdje vidim. Do čega je došlo ako može neko da objasni i šta je to realizirano, a šta nije, da li će se itd.“

Selmin Karić, predsjedavajući Općinskog vijeća: „Kolega Mehinović je uglavnom sve rekao ono što je bitno i ja ću samo jednu stvar napomenuti, a to je da je ovim rebalansom predviđen višak prihoda nad rashodima, odnosno suficit u iznosu 58.666 KM, a zbog pokrića deficita u 2020. godini. Bio je predviđen kroz nacrt budžeta za iduću godinu taj iznos, ali budući da se mogao uklopiti u ovaj rebalans, ubačen je u rebalans, tako da je deficit iz prethodne godine faktički pokriven u ovoj tekućoj godini.“

Emira Karić, predsjednica kluba vijećnika SDP: „Možda bih trebala da tražim pauzu i da pronađem u Poslovniku o radu koji je vremenski rok odgovaranja na vijećnička pitanja, kako je taj vremenski rok probijen. Naravno da znam koji je sljedeći put ako se ne odgovori vijećniku na vijećničko pitanje, a mislim da znate i vi, da mi to možemo uputiti tužilaštvu za nemar itd. Ne kažem da vi odgovarate, nego da vi pratite te stvari kako se ne bi dogodile neke negativnosti. Zaista nas nakon šest mjeseci trebate obavijestiti da li je kontaktirano, jer je usvojena vijećnička inicijativa. Usvaja se plan i program Općinskog vijeća za 2022. godinu, a nismo analizirali 2021. godinu.“

Kemal Bratić, općinski načelnik: „Predsjedavajući, zamjenice, uvažene vijećnice i vijećnici esalamu alejkum i dobar dan. Takođe želim svima nama danas uspješan rad i kao moji prethodnici puno zdravlja, sreće i rahat luka u godini koja nam dolazi, ako Bog da. Neću puno diskutovati pošto su prethodnici prije mene dosta toga i pojasnili i uzeli mi diskusiju. Ono što mogu reći jeste da smo svi zajedno otprilike ostvarili ono što smo planirali. Ima još prihoda od viših nivoa koji nisu oprihodovani, a oni koji se bave ekonomijom znaju šta to znači. Znači sredstva koja smo dobili nismo mi krivi, jer je neko raspisao poziv ili dao na potpisivanje ugovora o prenosu sredstava kasno i na kraju građevinske sezone, pa nismo uspjeli završiti procedure. Znači određena sredstva ćemo prenijeti u narednu godinu, a radi se o nastavku izgradnje dvorane u Maloj Brijesnici, ukoritavanju dijela rijeke od mosta uzvodno u Maloj Brijesnici i još nekoliko projekata. Znači ovaj budžet bi bio još veći, ali nam nisu sredstva doznačena, na neki način, na vrijeme. Ono što je bitno jeste, kao što neko prije mene reče, da nismo dužni nikome ništa, da su svim dobavljačima plaćene njihove fakture i da su svim korisnicima budžeta na vrijeme sve tranše uplaćene. Nekima, nismo bili prisiljeni, ali zbog određenih potraživanja i prebacili, prvenstveno kada se govori o sportskim klubovima i kulturno umjetničkim društvima. Budžet je transparentan za one koji znaju šta je budžet i koji hoće da vide kakav je. Svi mi vidimo šta se gradi ovdje, ako hoćemo da vidimo, a ako nećemo onda to i ne vidimo. Naravno ni mene ne raduje taj porez na dobitke na sreću i on bi bio još veći da neki gore na federalnom nivou ne koče. U prethodnim godinama bio je i preko 100.000, ako se sjećate kada smo diskutovali o tome. Kako se boriti protiv te pošasti, ja ne znam. Vjerujem da je svako sijelo i svaki sastanak tema toga. Broj tih pomoći socijalnim slučajevima se dosta smanjio i ne dajemo onima koji se time bave. Znači ni jedna pomoć se ne dodjeljuje bez popratne dokumentacije da li je za liječenje ili za nešto drugo. Vidjet ćete tamo kada bude izvršenje kroz budžetsku rezervu da smo veći dio sredstava dali, nažalost, za liječenje naših građana. Budžet je takav kakav jeste i rebalans se radi, kao što neko reče, da bi

se poravnali prihodi i rashodi. Na svu sreću sredstava imamo dovoljno da krenemo narednu godinu sa realizacijom infrastrukturnih projekata i sa praćenjem svega onoga što se zahtijeva od našeg budžeta. Budžet je takođe realno planiran i možda će biti i veći nego što je planiran za narednu godinu obzirom na sredstva koja ćemo prenijeti, a koja nismo oprihodovali u ovoj godini.“

Selmin Karić, predsjedavajući Općinskog vijeća: „Ima li još prijavljenih? Nema. Tačku dajem na izjašnjavaње. Ko je za usvajanje Prijedloga Rebalansa budžeta općine Doboj Istok za 2021. godinu?“

Glasanje: ZA – 17, PROTIV – 0, SUZDRŽANIH – 0.

2. Razmatranje i usvajanje Prijedloga Odluke o imenovanju Općinskog pravobranioca u Zajedničkom pravobranilaštvu za općine Čelić i Doboj Istok

Selmin Karić, predsjedavajući Općinskog vijeća: „Tačku dajem na diskusiju. Imate stav komisije. Ima li prijavljenih? Nema. Ko je za usvajanje Odluke o imenovanju Općinskog pravobranioca u Zajedničkom pravobranilaštvu za općine Čelić i Doboj Istok?“

Glasanje: ZA – 17, PROTIV – 0, SUZDRŽANIH – 0

3. Razmatranje i usvajanje Prijedloga Odluke o prenosu prava vlasništva stalnih sredstava

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

4. Razmatranje i usvajanje Prijedloga Odluke o nabavci stalnih sredstava i opreme za strukture civilne zaštite općine Doboj Istok

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

5. Razmatranje i usvajanje prijedloga Odluke o gubitku statusa javnog dobra u Lukavici Rijeci,

Selmin Karić, predsjedavajući Općinskog vijeća: „Tačku dajem na diskusiju. Imate stav Komisije za poljoprivredu. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

6. Razmatranje i usvajanje Prijedloga Odluke o naknadama za rad u Općinskom vijeću Doboj Istok,

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

7. Razmatranje i usvajanje Prijedloga Budžeta općine Doboj Istok za 2022. godinu

Selmin Karić, predsjedavajući Općinskog vijeća: „Imamo amandmana.“

Kemal Bratić, općinski načelnik: „Kao što ste vidjeli, kao što neko teče, hrabro i ja se iskreno nadam da ćemo uspjeti ostvariti zajedničkim snagama prihode, a kada ostvarimo prihode onda je to već podijeljeno po određenim kontima. Da li će biti odstupanja u idućoj godini, vidjet ćemo. Mislim da ne postoji niko da to može 100% planirati u fening. Ono što ja znam je da većina općina rade rebalanse, a neke i danas kao i mi. Kada se radi o amandmanima bilo je lijepih amandmana, ali neki od njih ne ispunjavaju formu. Znači član 110. Poslovnika kaže da su ovlašteni predlagači svaki član Općinskog vijeća, kolegij Općinskog vijeća, klubovi vijećnika i općinski načelnik. Ovdje jedino amandmani od vijećnika Skopljaka su na neki način zadovoljili ovu formu kada se radi o Poslovniku. Ostalo su predložile stranke koliko ja vidim Socijaldemokratska partija i Savez za bolju budućnost, tako da što se tiče amandmana od Socijaldemokratske partije i Saveza za bolju budućnost nisam u mogućnosti da prihvatim, jer bi prekršili

Poslovnik o radu član 110. U lijevom zaglavlju lijepo piše SDP – Socijaldemokratska partija i takođe Savez za bolju budućnost Općinski odbor Doboj Istok imaju i potpis. Kada se radi o prvom amandmanu uvaženog vijećnika Skopljaka koji se tiče Udruženja antifašista i boraca NOR-a u općini Doboj Istok, a isto se nalazi na spisku udruženja koje sufinansira općina iz svog budžeta. Predlažem da isto ubacite u budžet za 2022. godinu u iznosu od 4.000 KM, kao i ostala udruženja te kategorije. Sredstva skinuti sa konta 613991 ostale nespomenute usluge i dadžbine. Ja moram reći da mi imamo sasvim dovoljno antifašističkih udruženja i mislim da ne postoji ni jedno udruženje na prostoru općine Doboj Istok koje nije antifašističko od sportskog, umjetničkog ili nekog drugog, tako da mislim da mi sasvim dovoljno izdvajamo sredstava za rad tih udruženja. Tako da taj amandman nije prihvatljiv, ali nije isključeno da pomognemo iz budžetske rezerve to udruženje antifašista ako se obrati općinskom načelniku. Drugi amandman koji se tiče udruženja Unije veterana Doboj Istok je takođe za mene neprihvatljiv, jer smatram da se sva naša udruženja veterana, ja bih ih sve tako nazvao, ta boračka udruženja trebaju ujediniti u jedno udruženje i da zajednički traže i ostvaruju svoja prava. Mislim da bi bilo puno bolje i puno lakše i puno efikasnije. Isto tako ako tom udruženju zapne za rad u toku naredne godine spreman sam da pomognem na drugi način, a ne da ide u budžet. Ako ste pratili vidjeli ste tamo da smo ubacili dva kulturno umjetnička društva koja su napisala zahtjeve da ih ubacimo, a to su KUD „Lipe“ i KUD „2.juni“ da im na taj način pomognemo, što ne znači da nećemo pomagati i druga udruženja koja nismo ubacili u budžet. Mislim da trebamo što više ulagati u takva udruženja koja okupljaju našu djecu, koja predstavljaju tradiciju, koja predstavljaju kulturu bošnjačkog naroda, a što manje u ova neka druga udruženja. Da me neko krivo ne shvati nemam ništa protiv ni jednog udruženja i spreman sam svakome pomoći, ali mislim da u ovom trenutku nisam u mogućnosti prihvatiti ova dva amandmana iako bih rado prihvatio, ali naći ćemo načina da pomognemo i jednim i drugim.“

Emira Karić, predsjednica kluba vijećnika SDP: „ Uvaženi gospodine načelniče, deklarativno tvrdim da niste u pravu kada ste rekli da ovi amandmani nisu u skladu sa Poslovníkom, a evo objasniti ću. Znači kada neko piše Općinsko vijeće vraća se na Bosnu i Hercegovinu, pa Federaciju Bosne i Hercegovine, Općina Doboj Istok, pa Općinsko vijeće, to je kultura pisanja jednog dokumenta. Kada kažem vijećnik, vijećnik sam, odnosno predsjednica kluba SDP i onda Socijaldemokratska partija Bosne i Hercegovine, Općinski odbor SDP itd. Budući da dole stoji potpis Emira Karić znači da je podnijela amandman vijećnica Emira Karić. Da li neko vidi potpis predsjednika SDP Nermina Nikšića i predsjednika Općinske organizacije Alena Karića? Da su ti potpisi ja bih itekako prihvatila da ovi amandmani nisu u skladu sa Poslovníkom o radu i budu odbijeni. Dakle, ovo je samo kultura pisanja amandmana, vijećničkih pitanja ili šta god da se zna redoslijed odakle dolazi osoba koja podnosi amandman ili vijećničko pitanje ili vijećničku inicijativu. To što ste vi uzeli za razlog, naravno morali ste naći neki razlog. Vidjeli ste sam tok ove sjednice da jednostavno pružamo, ne da pružamo ruku, nego smatramo da stvari koje su kvalitetne i dobre treba podržati u kojima ima neke smjese gdje, hajmo reći, nije dobro biti kontra toga, onda stvarno ne vidimo ruku nekog pomirenja i zajedništva. Molim vas, načelniče, nemojte nas više razdvajati. Nemojte razdvajati vi i slični, nije to dobro generalno za Bosnu i Hercegovinu. Znači ako je neko podnio amandman koji nije loš i koji se može sprovesti da li se zva o ovaj ili onaj x,y zašto je problem podržati taj amandman. Dalje, postoji termin poluprihvaćen amandman. Ako si nešto i pogriješio amandmanom, načelnik izađe i kaže greška je u tome ovaj amandman se poluprihvaća ili nema dovoljno sredstava pa kaže evo ti 12.000 umjesto 25.000 i taj se amandman zove poluprihvaćen amandman. U redu nastavljate kurs kakav nastavljate, nije dobar i ja ću se pokušati mijenjati, nekada ću sugerisati, nekada ću ostati bez riječi i to je to.“

Kemal Bratić, općinski načelnik: „ Nisam uopšte imao namjeru to što vi tvrdite, niti ću imati u budućnosti. Ja sam dobio ovakav materijal u potpisu nema da je vijećnik. Od gospodina Harisa sam dobio ovaj amandman za kojeg sam rekao da je neprihvatljiv, a on će biti realizovan vjerovatno, jer nema spora da ne učestvujem u gradnji tog puta. Učestvovali smo i u onom i veći dio je finansirala općina Doboj Istok, ako niste znali. To je prema mezarju, je li tako? Čini mi se da smo 6 – 7.000 KM mi izvođaču radova platili, a ne znam šta ste vi skupljali i koliko ste platili, ali znam da smo mi veći dio toga platili, a i ovdje ćemo učestvovati. To je što se tiče tog amandmana. Većina ovih amandmana koje ste vi uložili vjerovatno će se i ostvariti. Mi damo ženama mimo budžeta i 1.000 – 1.500 ili 2.000 KM za intervenciju. Dat ćemo i antifašistima što znači da nemam namjeru da radim ono što vi tvrdite. Formalno pravno, molim vas, ovo je za mene SDP podnio amandman, jer ne piše vijećnik. Uvaženi vijećnik Skopljak je napisao vijećnik Kemal Skopljak i gore u lijevom zaglavlju. Nemam nikakvu namjeru da radim to što vi tvrdite. Hvala vam ako idete u tom pravcu da pružamo jedni drugima ruke, jer i ja sam za to i da svi zajedno gradimo i da ne

kritikujemo tamo gdje nema potrebe da kritikujemo, niti na fejbuku niti bilo gdje drugo. Ja nikoga ne kritikujem, radim svoj posao onako kako najbolje umijem, a zahvaljujući naravno vašoj podršci. Nećemo nikome uskratiti pomoć ko god je došao. Uradit ćemo neke stvari za koje nije nikome ni palo napamet da uloži amandman i pomoći sportskim klubovima u izgradnji infrastrukture u svim mjesnim zajednicama ne samo tamo gdje je sjedište naše općine. Ja vas molim da vi mene razumijete, ja vas potpuno razumijem i nije isključeno da ćemo pomoći i ići u tom pravcu da realizujemo nešto od ovih vaših prijedloga. Ja ću ih imati i čuvati i gledati da sve ono što možemo realizovati, realizujemo.“

Senada Džanić, predsjednica kluba vijećnika SBB, BPS Sefer Halilović i SBiH: „Pozdravljam vas i selamim. Član 4. stav 4. kaže: amandman mora biti podnesen u pisanoj formi i obavezno sadrži podatke: o podnosiocu amandmana – molim vas, predsjedavajući, je li ovdje piše podnosilac amandmana vijećnica Senada Džanić. Samo mi recite gdje u ovom stavu piše šta treba pisati na početku i da mi ne smijemo naglasiti iz koje smo političke partije. Jasno stoji podnosioc amandmana vijećnica Senada Džanić. Sve ostalo iz ovog stava je ispoštovano, amandmani su dobri i vjerovatno da bi se održala ova politika da se ništa ne prihvati što dolazi od opozicije, ali pravnog osnova za odbijanje amandmana nema.“

Selmin Karić, predsjedavajući Općinskog vijeća: „Sekretar je tu, pa ako treba da vam pojasni.“

Senada Džanić, predsjednica kluba vijećnika SBB, BPS Sefer Halilović i SBiH: „Nastavit ću dalje: na koji akt ulaže i šta predlaže, kao i obrazloženje rješenja koje predlaže i na kraju potpis ovlaštenog predlagača – u potpisu stoji vijećnica Senada Džanić. Nigdje se ne pominje Savez za bolju budućnost osim što nigdje nije naglašeno u stavu da mi ne možemo u lijevom uglu, je li negdje objašnjeno da treba staviti adresu ili političku partiju, nije. Ovdje nema pravila.“

Emira Karić, predsjednica kluba vijećnika SDP: „Nije stvar šta piše u ovom uglu, stvar je da li nekoga bode u oči to što piše u tom uglu. Samo je to stvar. Vas, načelnice, bode u oči ako mi istaknemo partiju iz koje dolazimo. Drugog osnova nema za vaše objašnjenje, a ne bih to nazvala ni objašnjenjem. Vi ste poslije toga, a niste bili u pravu, rekli da će se ti amandmani realizirati u budžetu 2022. godine i ja ću na prvoj sjednici u januaru tražiti da se iz Poslovnika izbace članovi u kojima se kaže amandman, u kojem se kaže vijećničko pitanje i u kojem se kaže vijećnička inicijativa, jer ćete vi to sve realizirati i što ja da postavljam pitanje kada ćete vi odgovoriti građanima na to pitanje i što da ja ulažem amandman kada ćete vi taj amandman već realizirati. Tako da ne bi bilo loše da mi pravno formalno to zadovoljimo, znači ići će inicijativa o ukidanju određenih članova Poslovnika o radu kako bi zadovoljili isključivo vaš rad.“

Haris Sinanović, vijećnik SDP: „Esalamu alejkum i dobar dan predsjedavajući i uvažene kolege i kolegice. Ja bih postavio pitanje i sebi i vama ili predsjedavajući da odgovori. Kako su do sada podnosivani amandmani i vijećničke inicijative? Šta se do sada radilo? Znači, u proteklim godinama i u ovoj godini dana, u istoj formi je koleginica Emira sigurno podnosila i inicijative i amandmane, koleginica Senada Džanić, a prošlu inicijativu sam ja podnio, jednu inicijativu i sada amandman. Samo ako mi možete odgovoriti na to pitanje.“

Selmin Karić, predsjedavajući Općinskog vijeća: „Kada su u pitanju amandmani rađene su izmjene i dopune Poslovnika o radu 2018. godine. Član 110. Poslovnika stav 4. je precizno definisao: Amandman mora biti podnesen u pisanoj formi i obavezno sadrži podatke: o podnosiocu amandmana, na koji akt ulaže i šta predlaže, kao i obrazloženje rješenja koje predlaže i na kraju potpis ovlaštenog predlagača. Znači o podnosiocu amandmana, na koji akt se ulaže amandman i šta predlaže i na kraju potpis ovlaštenog predlagača. Ovdje nije ispoštovan taj prvi dio koji se odnosi na podnosioca amandmana. Načelnik naravno ima pravo da se pozove na to.“

Kemal Skopljak, vijećnik BPS Sefer Halilović: „Pošto prvi puta izlazim da selamim i pozdravim sve prisutne i da izrazim svoje žaljenje za ovakvim odgovorom od strane načelnika. Načelnice, vi zaboravljate da je JOB krovno udruženje i da je bilo nekada u budžetu, da su antifašisti takođe bili u budžetu i da su izbačeni nekim slučajem. Ne znam kakvim, vjerovatno nisu bili podobni. Ovo je minimum minimuma što sam ja tražio da se jednostavno da mogućnost tim ljudima koji su u tim udruženjima da imaju istu šansu i priliku u svom djelovanju u Doboj Istoku. Ne vidim ništa loše, oni su registrovani, uredno prijavljeni, da se osnaže i da rade i da daju svoj doprinos u razvoju ove općine, pa makar to bilo na bilo koji način, nebitno na koji način.“

Kemal Bratić, općinski načelnik: „Očito se ne razumijemo. Nemam ništa protiv vaših amandmana, gospodine Skopljak, ali imam protiv načina na koji ste podnijeli amandmane. Da je i jedno od ta dva udruženja u nekom prethodnom periodu poslalo meni ili službi ili Općinskom vijeću svoj program rada, svoj plan rada i nemam ništa protiv da ubacimo udruženje u budžet. Iskreno nemam ništa protiv. Šta to koje udruženje radi? Šta mu je plan ubuduće? Koji su ciljevi koje hoće da ostvare? Ne možemo samo podnijeti amandman i dajte tom udruženju toliko i toliko. Ja obećavam idući budžet ako bilo koje udruženje tako napravi ja nemam ništa protiv da ide u budžet. Na kraju krajeva koliko ima članova to udruženje? Mislim da trebamo tako dodjeljivati sredstva. Ako nam neko kulturno umjetničko društvo pošalje program da je bilo na toliko i toliko smotri, da okuplja toliko i toliko članova, da skupljaju toliko i toliko sredstava, kako im ne dati, kako ih ne uvrstiti u budžet. Ja nisam za ovako. Isto tako predlažem za bilo koje udruženje, evo govorimo o ova dva udruženja, koje ne daj Bože da ja ponižavam, jer ona su nekada davno izbačena. Nisam siguran da li su prije mene kada sam izabran prvi puta, ovi antifašisti, nisam siguran i ne mogu to tvrditi, ali su davno nekada izbačeni. Dajte nam program rada, šta je plan JOB-a? Imamo toliko udruženja boračkih gdje izdvajamo toliko sredstava za svako udruženje i ne samo na našoj općini, nego na svim nivoima. Možemo pomoći naravno ukoliko dostave program rada, plan aktivnosti, šta su do sada uradili od antifašista do ovog udruženja kojeg ja izuzetno cijenim.“

Refik Šuvalić, vijećnik SDA: „Gospodine predsjedavajući, zamjeniče, načelnice, uvažene kolegice i kolege i ostali prisutni da vas sve srdačno selamim i da i ja iskoristim priliku da svima zaželim uspješnu Novu godinu da bude malo bolja od ove. Obzirom da nije bilo vijećničkih pitanja i inicijativa želio sam da se prisjetimo, obzirom na godišnjicu prije dva dana, našeg Osmana Junuzovića. Dosta je smrtnih slučajeva u protekloj godini od mandata ovog vijeća, koja praktično sutra završava, pa bih vas zamolio da se svi jednom Fatihom sjetimo našeg Osmana i svih naših umrlih koji su usljed pandemije ili nekih porodičnih tragedija, jer smo imali u određenim porodicama u par dana dva smrtna slučaja. Zamolio bih da se jednom Fatihom ili na neki drugi način prisjetimo svih. Neka im je vječni rahmet. Ovdje bih samo kratko vezano za tačku. Ja sam na našem klubu imao primjedbu obzirom da znamo šta znači BZK „Preporod“ za naše društvo, međutim nerad i vjerujte da sam i ja sam sebe ubijedio da moramo dokazati svim ovim predstavnicima udruženja da to ne može biti društvo jednog lica. Mi se trebamo boriti u budućem periodu da se pojave novi ljudi, da se organizuje Preporod u skladu sa svojim programom i ono što znači Preporod našem društvu. Ponovo sam za to kada se steknu uslovi i odrade se ove stvari u tom udruženju koje trebaju da se ponovo vrati u budžet. Tako isto mislim i na ove neke stvari i da trebamo u budućem periodu razmišljati, ove godine smo zakasnili, da se odrede programske aktivnosti i da se aplicira na određena sredstva. Ja mislim da mnoge, koji ne rade i koji hoće tek tako da se stave ovdje, a ne daju nikakav društveni značaj, nisam za to da se u budućem periodu stave u budžet.“

Senada Džanić, predsjednica kluba vijećnika SBB, BPS Sefer Halilović i SBiH: „Mišljenja sam da su amandmani koje sam podnijela izuzetno dobri i opravdani da općina ne može ispraviti različitost dječijeg doplatka po kantonima, ali mi možemo pokazati prihvatanjem ovakvih amandmana da je općini Doboj Istok važan natalitet, zdrava i sretna porodica, da su joj važni učenici i jedina srednja škola na ovoj općini. Predsjedavajući, pošto sam magistar razredne nastave, ovo slovo J nije ispravno, pa bojim se da sjednica neće biti regularna.“

Emira Karić, predsjednica kluba vijećnika SDP: „Ovdje ne može pisati moje ime i prezime, moj broj telefona itd. To nikada neće pisati, jer vi znate moju adresu, ali ovdje moja adresa neće biti. Znači ovdje sam izabrana iz reda Socijaldemokratske partije i ovo je politička stvar gdje mi pišemo političku adresu. To je moj stav, a vi imate svoje stavove. Isto tako nadovezat ću se opet na kurs gospodina načelnika i reći nije taj kurs dobar. Gospodine načelnice, bila sam i tražila projekat vezan za trakaste zavjese i vi ste ga na neki način odobrili. Ovdje je bilo 15 ljudi kada ste vi rekli da se taj predračun pošalje na Općinu Doboj Istok. Iz meni nepoznatih razloga ste odustali od tog projekta. Vjerujte mi to je bio samo čin dobre volje da na nekim skupovima spomenem gospodina načelnika i Općinu Doboj Istok uz ostale koji pomažu JU Osnovna škola „Brijesnica“. Eto vidim da niste imali sluha ni za to i zato nemojte se ljutiti kada ne budete pozvani ili negdje spomenuti, ali da nešto negativno pišem u svakom slučaju neću.“

Kemal Bratić, općinski načelnik: „Mislio sam da je završeno za te zavjese, ali provjerit ću. Kada se radi o amandmanima koji ne ispunjavaju tehničke uslove Saveza za bolju budućnost mislim da su površni. Zašto to mislim? Ukoliko mi planiramo 20.000, a može biti 50 ili 60 ne znamo mi koliko. Znači, trebali ste

navesti nekakve pokazatelje ako se već bavite tim studioznim ispitivanjima, uvažena magistrica, trebali ste nam dodati nekih podataka da imamo. Kada se radi ovdje o ovom drugom amandmanu koje se odnosi na putovanje ja koliko znam ta putovanja su plaćena od strane Ministarstva obrazovanja. Možda griješim. Jedna jedina nam škola, čiji je osnivač i Općina Doboj Istok i kada tamo dođe načelnik onda uvažena direktorica ne dozvoli da načelnik pozdravi prisutne i zaželi im dobrodošlicu. Načelnik se ne ljuti, to je stvar organizatora i kulture onoga ko je organizovao tu manifestaciju, a istodobno se traži određena podrška. Da bi pružili nekome ruku mora i on vama pružiti. Ne može samo jedna strana da pruža ruku a druga da ne pruža. Ja ću spremno dočekati svačiju ruku, jer takav sam po prirodi. Svakome halalim ono što je bilo i hajmo raditi dalje, jer nama je ovdje zajedno živjeti i raditi i boriti se u ova teška vremena. Znači teška vremena za našu državu, za našu djecu, jer ne znamo šta ih u budućnosti čeka. Iskreno se nadam da ima dovoljno patriota i da ćemo uspjeti ovo izgurati na jedan pravi put. Molio bih predlagača kada su ovakvi amandmani u pitanju dajte nam podatke, dajte nam, pokazatelje koliko je to učenika, koliko to ima planirano svako treće i naredno novorođeno dijete. Znači moramo imati pokazatelje. Ne možemo planirati 20, a treba nam 50 ili 100.000, jer ne znamo koliko imamo takvih porodica i takvih žena koje su rodile troje i više djece. To sam imao potrebu da kažem.“

Hasan Hasančević, predsjednik kluba vijećnika SDA: „Uvaženi predsjedavajući, zamjeniče, kolege i kolegice, općinski načelnice sa pomoćnicima želim iskreno da vas poselamim i pozdravim. Izašao sam da kažem par rečenica o budžetu, jer niko nije spomenuo da je sindikat općine Doboj Istok potpisao sporazum sa općinskim načelnikom.“

Selmin Karić, predsjedavajući Općinskog vijeća: „Kolega Hasane, još je rasprava o amandmanima.“

Hasan Hasančević, predsjednik kluba vijećnika SDA: „Izvinjavam se. Reći ću i za amandmane. Predlažem da ubuduće sve što nije u nadležnosti općine Doboj Istok, ne da raspravljamo, nego da ne podnosi niko od vijećnika i vijećnica. Znači što nema veze sa nama iz milion razloga, jer ovdje ću otvoriti veliku polemiku ako počnem pričati zbog čega je to tako. Ono što je naša nadležnost da to radimo, a da pustimo ministarstvima što je njihova nadležnost.“

Senada Džanić, predsjednica kluba vijećnika SBB, BPS Sefer Halilović i SBiH: „Ne mogu da se ne osvrnem na ono što je načelnik rekao jednom je neko rekao uvažavajte da bi bili uvažavani. Načelnice, kada se vi niste obratili na ispraćaju maturanata meni je stvarno bilo žao. Međutim, mi smo u našim pozivnicama jasno naglasili dan prije do, sad ne znam, 15:00 sati da nam se potvrdi dolazak. Dolazak su potvrdili ministri iz Vlade Kantona, poslali mejlove, zvali telefonom, potvrdili su kantonalni zastupnici, potvrdile su mnoge javne ličnosti, a od vas, načelnice, do par sati prije nije bilo nikakvog odgovora. Kad radite jednu veliku manifestaciju, a ja želim dostojanstveno raditi manifestacije, vi ste toliko puta se obraćali na velikim manifestacijama na području općine Doboj Istok koje sam ja organizovala zajedno sa dobrim kolektivima. Treba poštovani to, jer nije lako kad neko poremeti kompletno, znači kompletno, konferansu itd. Zamislite ulažete trud par mjeseci, a neko ne može ni telefonom reći evo doći ću možda ću kasniti, možda ne, ali da se ostavi prostor. Nema nikakvog odgovora i onda par sati prije kad je sve završeno i kad nemamo potvrdu dolaska nama se kaže da ćete vi doći. Nemoguće je kad se rade dobre manifestacije, dobre manifestacije, tako se ponašati. Ne trebate vi načelnice, poštovati Senadu Džanić, poštujujte Mješovitu srednju školu Doboj Istok i sav taj trud koji smo taj dan uložili, a ulagali smo ga dva mjeseca prije, jako puno. Što se tiče amandmana znači rekla sam, a krenut ću od Mješovite srednje škole, tražili smo 5.000 KM. 5.000 KM iz budžeta općine uveliko bi pomoglo djeci putnicima iz Republike Srpske koji dolaze, plaćaju prevoz, jer žele da pohađaju nastavu u našoj Općini, u Federaciji. Koji je to broj, načelnice, učenika? Daj Bože da ih bude, pa da dobiju po 10 KM i da ih tako puno ima. Ova cifra bi bila podijeljena na broj učenika i to bi pokazalo jednu brigu, pokazalo bi jednu pomoć. Na kraju krajeva ima tu roditelja koji jako teško finansijski podnesu taj prevoz, ali iz patriotizma ljubavi i prema našoj Općini i Bosni i Hercegovini i iz mnogo mnogo drugih razloga šalju djecu u našu jedinu srednju školu. Drugo, kada je u pitanju treće i svako naredno dijete, ja sam imala po podacima prethodnih godina da je to 12 – 15 djece. Izdvajanjem 20.000 vi, načelnice, kažete da to može biti 50, daj Bože da ih bude 100, daj Bože, jer imamo stalni pad nataliteta i ne verujem da taj broj može tako odstupati. Daj Bože, pa da nam se tu pojavi manjak sredstava. Ko kaže koja je cifra koju da podijelimo tim majkama, da pokažemo brigu prema tim porodicama. Nismo naveli cifru, nego vi, načelnice, na kraju godine, evo po ugledu na općinu Tešanj, vi obiđete te porodice i dodijelite. Mislim da nema nijedan opravdan razlog osim, kako sam rekla,

ako je opravdan razlog da se ova sjednica poništi radi greške u pisanju slova J, onda i ovi amandmani da se odbiju.“

Kemal Bratić, općinski načelnik: „Žao mi je, uvažena vijećnice, što ste tužni zbog te manifestacije, jer se načelnik nije obratio. Ne morate vi mene privatno voljeti i poštovati. Ja svakoga poštujem kao instituciju. Vi ste za mene direktorica i vi i uvažena vijećnica Emira i svi vijećnici. Znači, svi mi znamo, da ne otvaramo karte ovdje, kako vi konferanse križate i izbacujete ko će šta pričati i ko će šta raditi. Nemojte, ali ako bude bilo potrebno otvorit ću ovdje sve. Znači, nije tačno da se nisam najavio da ću doći dan prije, ali to je nebitno. Kada se radi o amandmanima, vi znate da vi ne posjedujete svoj račun i mi bi ta sredstva morali doznačavati Ministarstvu obrazovanja za plaćanje za tu djecu. Znači morali bi raspisati poziv, moramo znati tačan broj učenika itd. Ja ovdje govorim o realnim stvarima i ne izmišljam zato da bi vam odbio amandman. Govorim realno. Isto kada se radi i o ovome drugom, moramo znati šta otvaramo. Reći će oni što imaju po dvoje zašto mi ne bi dobili i dajte da malo rezonski razmišljamo. Zašto? Sigurno će vam reći porodice koje imaju dvoje djece ili koje imaju jedno, zašto i mi ne bi dobili za jedno ili dvoje ako su ovi dobili po 1.000, zašto ovi ne bi dobili po 700, a ovi po 500 KM. To je logika i ja to tako gledam. Moramo imati pokazatelje. Ne možemo se mi porediti sa općinom Tešanj, niti naš Kanton sa Kantom Sarajevo, a znamo iz kojeg razloga. Dabogda mi bili jači od svih njih, nekada, ako Bog da. Tako da nemam lošu namjeru i ne odbijam amandmane iz razloga što nisu dobri, ali moramo imati više mesa. Evo vam vrijeme, ova godina, pripremite pokazatelje zajedno sa direktorom Centra za socijalni rad i za jednu i za drugu kategoriju. Šta je srednja škola? Srednja škola je firma i ja ju tako doživljam, jer menadžment škole mora da se bori za potencijalne klijente, a to su učenici. Zašto? Imamo škola na sve strane i imaju možda veći izbor i možda bolji kadar. Mada tvrdim da je naš kadar najbolji. Znači i vi se morate boriti. Nije problem taj novac, sigurno, ako dijete hoće da uči i radi. Niko nije nezavršio školu, jer mu baba nije mogao plaćati kartu i to je 100%. Dajte nam pokazatelje i ja sam spreman iz budžetske rezerve i jednu i drugu kategoriju pomoći, ali dajte nam podatke i prijedlog, pa ćemo ovdje raspravljati na Vijeću, a ne da ja sam donosim odluku o takvim stvarima. Znači mora postojati nekakav pravilnik zašto mi nekome dajemo sredstva.“

Omer Konjić, vijećnik SDA: „Da vas sve poselamim i pozdravim. Što se tiče ovog prevoza i ovih amandmana direktorice Senade u dosadašnjem periodu dok sam bio direktor i dok je bio prethodni direktor, mimo prevoza što plaća ministarstvo, mi smo do sada sa udruženjima sa kojim saradujemo mislim za 36 učenika srednjih škola plaćali prevoz baš iz tih tamo povratničkih mjesta Sjenina, Grapska i ne znam još koje mjesto. To je sve išlo u saradnju sa direktorom. Od kako ste vi postali direktorica šta god sam vam ja predložio, vi mislite da na stranačkoj osnovi neko nekoga mrzi. To je non stop bilo tako. Ja bar imam takav osjećaj zbog vaše komunikacije. Što se tiče djece za 1.000 maraka Ministarstvo za rad socijalnu politiku plaća svim roditeljima koji imaju troje zajedničke djece. Bilo je malo tu problema, jer je bilo roditelja koji imaju više djece, ali sa različitim partnerima. Od nove godine su rekli da će ići 1.500 KM samo da imaju troje djece.“

Emira Karić, predsjednica kluba vijećnika SDP: „Počeli smo biti iskreni na ovoj sjednici, pa ću i ja biti iskrena i reći ću da se gospodin načelnik napravio iznenađen kad su u pitanju trakaste zavjese. Mogu prozvati osobu od koje sam čula da je prekrizio taj projekat. Hoću samo da kažem da nije problem, ja sam se snašla za taj projekat. U centralnoj školi bit će trakaste zavjese i neću više opterećivati općinu niti sa jednim projektom, ali isto tako ne očekujte, a mislila sam, bez obzira da li se povuče 100.000 od Federacije i Kantona, na isti način moja kultura mi nalaže da uvažim i onog od 100.000, milion i onog od 1.000 ili 2.000. I to je bio moj nijet, kao što kaže uvaženi kolega Hasan, ali evo vi ste sami doprinijeli da od toga nema ništa.“

Selmin Karić, predsjedavajući Općinskog vijeća: „Kada su u pitanju forme amandmana mi smo u ranijem periodu imali problema sa tim. 2018. godine većina nas je bila tu i radili smo izmjene i dopune Poslovnika o radu baš iz tih razloga, gdje smo decidno naveli šta treba da sadrži svaki amandman. Znači, decidno je napisano kako forma treba da izgleda. Ja sam malo prije rekao to je načelnikovo i ima pravo na to. Ima li još diskustanata?“

Senada Džanić, predsjednica kluba vijećnika SBB, BPS Sefer Halilović i SBiH: „Samo da direktoru Centra za socijalni rad kažem kad je u pitanju ko to na osnovu politike radi neke stvari. Ni mom prethodniku Eldinu Skopljaku takođe niste izašli u susret kad je u pitanju ovaj prevoz učenika. Hoću da

vam kažem Eldin Skopljak SDP, Senada Džanić SBB i prestaje komunikacija. Direktore, ja ću već u idućoj sedmici rado vam se obratiti sa ovim problemom. Da ste ikada spomenuli, jer ja stvarno nemam problem kad je u pitanju interes učenika i škole. Drugo, htjela sam reći, čini mi se da načelnik kaže da to ide preko ministarstva, ne ide, jer ministarstvo sufinansira učenike osnovnih škola. Nažalost još nema sufinansiranja učenika srednjih škola pogotovo što su kroz ovaj amandman navedena djeca koja dolaze iz Republike Srpske, znači Grapska, Sjenina, Lukavica, jer svi znamo koji je doprinos tog u stanovništva u odbrani i Doboj Istoka i Bosne i Hercegovine. Tako da ne bi taj novac išao preko ministarstva nego u dogovoru, a ja znam načelnice da ćete vi, ako bude dobre volje, naći put sa prevoznicima. Rekli ste da niko zbog prevoza ne ostane da ne završi srednju školu. Tačno je, ali ti učenici žele da pohađaju u Federaciji, žele da pohađaju u našoj srednjoj školi, a nama je u interesu da budu naši učenici, jer ako idu u Republiku Srpsku onda nemaju troškova prijevoza. Zašto im ne pomoći, a smatram da je to tako opravdano.“

Omer Konjić, vijećnik SDA: „Ja uvažena direktorice, moram reći da vi ne govorite istinu za ovom govornicom. Centar za socijalni rad preko udruženja već plaća nekim učenicima koji pohađaju srednju školu u Brijesnici, a putuju. Znači, već im plaća. Zašto? Ranije im je plaćano kad je prestala ta komunikacija vas direktora. Ja ni od koga ne bježim i u svakom momentu ću izaći u susret što se toga tiče. Mene su zvali roditelji i mi smo nastavili za određenu djecu za koju su roditelji zvali i nastavili plaćati taj prevoz. Roditelji nemaju ništa sa tim prevozom, mi sve završimo sa prevoznikom i za svaki mjesec ide se unaprijed i plaća mjesečna karta. To što vi ne želite ili ne znam šta, to nije moj problem. Ja vam svaki dan stojim tamo na raspolaganju.“

Haris Sinanović, vijećnik SDP: „Vezano za ono što sam govorio. Ako je to ova izmjena od 2018. godine u vezi forme amandmana, znači postavlja se pitanje od 2018. godine, od šestog mjeseca, šta ste radili? Što niste opominjali tada i ne prihvatili inicijative i ovo? Druga stvar, ja ovdje ne vidim, stvarno ne vidim, kaže ovlaštene predlagači akata svaki član Općinskog vijeća, Kolegij Općinskog vijeća, klubovi vijećnika, pojedinačno ili zajednički. Klubovi su stranački, a nigdje isto tako ne piše šta ne treba da stoji, jer je ovo vrlo kratko. Znači ne treba da stoji, nema odluke nikakve.“

Selmin Karić, predsjedavajući Općinskog vijeća: „Znači, kada su u pitanju predstavnički organi bilo kojeg nivoa vlasti, samo ono što je napisano, to se tiče, a kada su u pitanju građani, to je nešto drugo. Na njih se odnosi da sve ono što nije napisano je dozvoljeno. Kada su u pitanju svi nivoi predstavničke vlasti samo ono što je napisano to se mora poštovati.“

Senada Džanić, predsjednica kluba vijećnika SBB, BPS Sefer Halilović i SBiH: „Moram reći direktoru Centara za socijalni rad da ja uvijek govorim istinu. Znači, ne možete me prozvati za ovom govornicom i reći mi kako ne govorim istinu. Vi pomažete učenike, a pročitajte amandman molim vas, učenike iz socijalno ugroženih porodica, a amandman se odnosi na svu djecu koja dolaze iz tog područja. Nama je u interesu da dolaze i ja mislim da je sa moralne strane lijepo da pokažemo brigu. Drugo, vi uporno govorite vi, kolega Omere, to radi Centar za socijalni rad, a Mješovita srednja škola, evo nisam to htjela iznositi za govornicom, od svog primanja izdvaja u fond iz koga plaća karte. Tako da je razlika, ja mogu reći ja i moje kolege, a vi to dajete iz Centra za socijalni rad, a to je velika razlika. Vi ne dajete od svojih primanja, a mi to radimo od svojih primanja za dobrobit učenika. Drugo, molim vas nisam rekla ništa što nije istina i ne možete za ovom govornicom reći nešto tako.“

Hasan Hasančević, predsjednik kluba vijećnika SDA: „Ja bih vas zamolio sve da se uozbiljimo. Ovo je krajnje neozbiljno. Određeni animoziteti jednih ljudi prema drugima i ja treba da sjedim ovdje šest sati. Sjedite i izljubite se na kahvi, zovite se za Bajram, za Novu godinu, a evo sad je Nova godina ispričajte se o onome što trebate. Ja ne mogu kidisat reći ko je bio ispred mene, a ti ne možeš kidisati reći ko je bio iza tebe, je li, za govornicom? Ko ne znamo mi niko ništa. Šta vam je? Mi smo odrasli, porodični ljudi.“

Selmin Karić, predsjedavajući Općinskog vijeća: „Zaključujem diskusiju po amandmanima i konstatujem da načelnik nije prihvatio amandmane. Sada može pauza.“

Emira Karić, predsjednica kluba vijećnika SDP, je zatražila pauzu.

Zamjenik predsjedavajućeg je dao pauzu od 10 minuta.

Sjednica je nastavljena u 11,40 minuta.

Selmin Karić, predsjedavajući Općinskog vijeća: „Nastavljamo sa 7. tačkom. Otvaram diskusiju, izvolite.“

Mehmed Mehinović, vijećnik SBiH: „ Jednu konstataciju da kažem na početku. Stvarno mi je žao, jer bili smo blizu da jednoglasno usvojimo ovaj budžet. Uložio sam dosta truda u to i malo razumijevanja trebalo je i mislio sam da će to biti u redu. Nije isto kada ne glasa i opozicija za budžet, jer ima sasvim drugačiju dimenziju i težinu. Bar u moje vrijeme sve sam učinio, ali ovakav je stav zauzet. Ja ću biti korektan i iskren i neće biti problema, ali žao mi je, stvarno mi je žao i nisam mogao da to ne kažem. Ja amandmanski nisam djelovao pa možda neko može reći nemoj ni pričati. Ja naravno kao vijećnik imam vijećničko pravo da pričam, jer mi je davno rečeno kada sam amandmanski djelovao, jedan dosta ozbiljan čovek mi je prišao i rekao i ti si dosta ozbiljan, nemoj jer ništa ti neće biti prihvaćeno, možeš pričati šta hoćeš. Ja u zadnjih šest godina nisam ni jedan amandman uputio, jer tako je to, ali hoću da pričam o budžetu. Volio bih da svi budemo ravnopravni i ja želim da budemo ravnopravni. Nikako se ne mogu oteti utisku, prije šest godina kada smo slavili Dan općine kada su svi vijećnici pozvani na ručak osim Mehmeda Mehinovića. Naravno da sam istražio ko je to rekao da se ne zove, naravno ovdje ne mislim na načelnika, to je uradio čovjek za koga sam ja dosta uradio, izvukao ga, da ne kažem, iz naftalina da bude to što jest danas. Želim da se to ne ponovi nikome što se meni desilo, predsjedavajući, da to bude kako treba. Ponovo da kažem onu svoju poznatu diskusiju o budžetu i ja želim da ona bude korisna, jer smatram da znam puno stvari o tome. Neće biti politička priča, neće niko poznati jesam li opozicija ili sam pozicija kada bude preslušavao, jednostavno hoću kao profesionalac da kažem par riječi, odnosno svoje viđenje. Onom ko predlaže budžet teško je pogoditi sve, međutim treba gledati da to bude makar sintetički urađeno kako treba. Bilo bi ružno da ja sada sjedim i da ne kažem par riječi o jednom, poslije Statuta općine najvažnijem dokumentu, odnosno drugom po važnosti dokumentu - budžetu. Na početku moram reći i moram biti pošten, da ovaj ponuđeni budžet ima dosta, da kažem i dobrih stvari. Ima i onih koje nisu dobre, ali se lako mogu otkloniti da bi budžet bio dobar, dobro upakovan, pa čak i odličan budžet. Šta je dobro? Ima dobrih i loših stvari. Optimista sam i govorim o dobrim stvarima prvo, pa onda, kažem ono što po meni, ovo je moje viđenje ovog budžeta i ne morate se slagati, međutim nastojat ću argumentima da pokažem da sam u pravu. Šta je dobro? Dobro je što budžet donosimo 30.12. u tekućoj godini za narednu godinu, rasterećeni smo nekih hipoteka, ulazimo u realizaciju budžeta odmah sa januarom i nemamo problema oko donošenja odluke o privremenom finansiranju. Dalje, šta je drugo dobro? Planiran je kvantativno velik budžet, a predlagač zna je li on preambiciozan ili realan, pa ako bih ja cijenio tu je to negdje, a vjerovatno ulaznih informacija inputa ima više od mene. Vjerovatno se niko ne bi upuštao u nešto da mora praviti rebalans na dole za 20% ili ne znam ni ja, to je ružna stvar, ali mislim da na osnovu nekih pokazatelja se ide. 3. struktura budžeta je dobra i u prihodima i u rashodima. Svaki stručnjak, a pogotovo finansijski ne gleda pojedina konta, njega to ne interesuje, reprezentacija, dnevnice i ovo ono, uvijek se gleda struktura prihoda i struktura rashoda. Ovdje je struktura dobra. Za ovaj budžet od 4.339.000 predviđeno je poreza 2.462.000, taksu je predviđeno 537.000 i dotacija viših nivoa vlasti 31% ili 1.340.000. Znači 57% poreza, taksu 12% i 31% dotacija, što će reći da ima 68% vlastitih prihoda u strukturi budžeta. Rashodi su tekući izdaci i to su plate i ono što se troši na rad organa uprave i nižim nivoima vlasti 2.664.000 ili 61% i kapitalni izdaci čak 1.675.000. Znači, predviđena su vlastita sredstva za ulaganja što daje razliku od 8% da se može intervenisati. Ponovo je budžet planiran kao samoodrživ, a čak ima razlike da se može prebaciti dio sredstava iz vlastitih prihoda za kapitalne izdatke. Naravno ako bude ostvaren ovaj priliv, ali kažu da postoji obećanje da će to biti ok. Sljedeće šta je dobro u ovom budžetu je da ima rast budžeta. Dobro je što se izdvojilo za Centar za socijalni rad nešto još više, dobro je da ima više i za stipendije, dobro je sa sindikatom za plaće, dobro je da je odluka Općinskog vijeća ubačena, dobro je da ima više i Sportskom savezu. Znači otprilike vodilo se računa o nekim stvarima i vođeno je računa da neke stvari budu podmirene i ne samo kapitalni izdaci nego i ova nadgradnja, da tako kažem, građani. Što bi mi željeli pojedinačno da to bude u nekom drugom smjeru ubačeno, ne može. Međutim evo dobro ima toga i ja sam htio da kažem kad je Centar za socijalni rad čudno mi da nema i Dječijeg obdaništa, međutim sjetio sam se da Obdanište ima vlastite prihode. Međutim možda ne bi bilo loše da koja hiljadica i tamo otišla, ali evo nisam amandmanski djelovao. Šta po meni nije dobro? Stvarno ovo nije neka kritika, međutim mislim da ćete se služiti s nama. Svaka i finansijska analfabeta, koja ne pozna baš finansije kako treba, zna da se svaki plan, a pogotovo budžet, planira na osnovu nečega. On se može planirati na osnovu plana za prethodnu godinu, može se planirati na osnovu rebalansa, na osnovu izvršenja za devet mjeseci, odnosno procjene izvršenja za tekuću godinu za narednu godinu. Ne sumnjam

da i ovaj budžet nije tako planiran, međutim nama je ovdje u tabeli jednostavno teško se snaći i puno bolje je rebalans napravljen nego budžet. Neko kaže transparentan. Nije transparentan. On je transparentan sa aspekta konta koja će se dostaviti višim nivoima vlasti i knjigovodstvu da može knjižiti, međutim uporednih pokazatelja nema. Mi smo morali znati ili da nekog od vas da pitam, a izvinjavam se onima koji znaju, koliko je budžet u procentima veći u odnosu na rebalans budžeta za prethodnu godinu. Koliko je veći? Trebalo je da stoji. Reći ću vam 18%. Da ne govorim sada o drugim troškovima, o plaćama, o Centru za socijalni rad, o Vijeću i nekim drugim stvarima. To nije problem za one koji rade budžet otprilike da to pojasni i da napravi jedne uporedne pokazatelje, samo da prenesu tabelu iz rebalansa i da mi imamo i da vidimo šta je to raslo, a šta je padalo. Vi sada ne znate, ali ja znam i mogu vam reći koliko su rasli pojedini doprinosi, porez i doprinosi. Rekli smo da su u rebalansu povećani, ali u planu su još povećani. Možda je to dobro, ali možda i nije dobro, ne znam, po meni trebalo ih je zadržati onakve kakve jesu. Znači, rebalans budžeta je 3.670.000, a planiran budžet 4.339.000 + 18%. Znači optimistički i čim on raste preko 10% to je stvarno optimistički i ne može se reći da nije dobar budžet. Dotacije – ostvaren sa 820%, planirane 1.340.000 ili 63% povećanje. Čuli smo izlaganje da nisu neki prihodi oprihodovani pa će biti oprihodovani kada se bude plaćeno i da je to možda i realno, ja ne znam. Porezi – 2.398.000 ostvareno u prošloj godini, 2.463.000 planirano u sljedećoj godini 5% rasta. To je dobro. Takse – to su vlastiti prirodni sa vjenčanja, predmjer katastra nekretnina i tako da ne nabrajam koji su to porezi otprilike, ostvareni sa 483.000, a planirano 537.000, povećanje 11%. Bojim se da neće biti i da je i ovo ambiciozno, da ne bude udar na džep građana, jer takse plaćaju naši građani. Možda je trebalo biti malo mudriji pa staviti, po meni, ali ja podržavam i ovo da rastu 11%, kome nije puno. Po rebalansu tekući izdaci su bili 2.557.000, planirani po budžetu 2.664.000 ili 5% povećanje. Ok, da je i 10% da bih ovdje digao ruku, jer treba pratiti sindikat treba pratiti još neke stvari, jer biće tu rasta nekih troškova struje i tako dalje. Kapitalni izdaci 150% jako dobro, optimistički, 50% više nego što je ostvareno u rebalansu, znači planira se izgraditi na općini Doboju Istok više nego što je to tekuće godine urađeno. Ja postavljam pitanje ponovo. Zar ne treba vijećnicima napisati u šta će se uložiti 1.675.000? Makar sintetički da to znam. Ja sam pokušao i kada imam vremena ja preradim sve materijale i plan načelnika za iduću godinu. Jedna tabela je odlično napravljena i svi su projekti dobri, pa sam pokušao njih otprilike da tamo nađem, međutim nisam, jer u 2022 godini planirano je samo 82.000, ja sam to sabrao, 2023. godini 350.000 i 2024. godini 1.372.000. Sada koji god se odgovor ponudi da mi se kaže, ja ne znam, možda je to sve ok, ali ja ga ne znam, ali ne znate ga ni vi koji ste ovdje prisutni. Zato ja kažem da je transparentnost da se to kaže i da vijećnici budu upućeni, da ja mogu izaći i sa ljudima pričati o općini, kao što sam ima neki dan kazao šta je općina. Bez obzira što pripadam opoziciji, ja branim općinu, jer znam šta je općina i naravno samim tim i ljude koji radi u općini. Dosta sam ja vremena, od 25. decembra 1995. godine ja sam zasnovao radni odnos u ovoj općini. Klasa 6. troškovi – šta to po mojoj procjeni je trebalo ili nije trebalo u troškovima. Nemam Bog zna neke primjedbe, a nastojao sam da nešto izvučem i da vidim na šta bi mogao staviti primjedbu. Električna energija, rebalansom 125.000, povećano je za 116%, vjerovatno se očekuje povećanje, ali mi je nešto puno. Rekao sam da je Centru za socijalni rad povećano i to je dobro, treba to popratiti. Stipendije – odlično povećane stipendije na to ne možeš biti imun, samo sam htio da konstatujem neke dobre stvari. Sportski savez – odlično malo povećano, a ima tu i kapitalnih ulaganja. Drago mi je da je konto 611100, a to su plate i bruto troškovi našli povećanje i to je sigurno sa sindikatom sklopljen sporazum i ja tu nemam nikakve primjedbe i uvijek bi za to digao ruku. Dalje, objašnjenje ovom budžetu i ja ne mogu zbog rahmetli Safeta koji je zajedno sa mnom bio i uvijek smo govorili da nije budžet tako loš, pogotovo struktura, međutim ovaj narativni dio, ne znam zbog čega se ne može pojasniti. Da li su to principi, a svi govorimo da trebamo pružiti ruku pomirenja. Bit će teška i ova godina, nemojte misliti što smo ovakav budžet koncipirali da će sve biti lako ostvariti. To će biti teret izvršnim organima. Ja mislim da mi kao Vijeće trebamo biti suport izvršnom organu i da im pomognemo, a ne da odmažemo, jer mislim da smo na istom putu. Jedni druge trebamo uvažavati i žao mi je što ovaj budžet neće biti jednoglasno usvojen, jer ima dobrih, a nastojao sam da kažem koje su to otprilike loše stvari. Imao sam toga još pričati, međutim dosta vremena smo ostali na amandmanima. Sve u svemu ambiciozan budžet, dobro postavljen, po meni, može pričati ko god šta hoće, ne transparentan, transparentan je samo sa aspekta knjigovodstva i viših nivoa vlasti, ali da je transparentan vijećnicima i građanima, nije.“

Emira Karić, predsjednica kluba vijećnika SDP: „Prije svega da se zahvalim vijećniku Mehmedu na ekspert diskusiji. Završili smo dakle diskusiju o predloženim amandmanima i samo ću da dodam da se ispoštuje član 117. Poslovnika o radu - Ako vijećnik zatraži da se Vijeće posebno izjasni o amandmanu sa kojim se podnosioc prijedloga odluke ili općeg akta nije saglasio, o tome amandmanu se glasa odvojeno.

Tražim evo za svoje amandmane ili da glasamo pojedinačno ili da se odnosi na sve amandmane. Ako treba tražit će i oni za svoje amandmane.“

Selmin Karić, predsjedavajući Općinskog vijeća: „Kolegice, vi ste u pravu, ali niko od vas nije tražio da se glasa po amandmanima, a ja sam zaključio diskusiju.“

Emira Karić, predsjednica kluba vijećnika SDP: „Ovo nije zaključena diskusija o tački dnevnog reda. Mi smo zaključili diskusiju o predloženim amandmanima i ostalo je samo da ja još dodam...“

Selmin Karić, predsjedavajući Općinskog vijeća: „Ja sam zaključio raspravu po amandmanima i vi ste tražili pauzu.“

Emira Karić, predsjednica kluba vijećnika SDP: „Nakon diskusije ja imam pravo pozvati se na član 117. Znači, nakon diskusije i ne mogu ja u diskusiji, jer se u diskusiji pričalo hoćemo li prihvatiti ili nećemo. Znači niste prihvatili amandmane i otišli na pauzu.“

Selmin Karić, predsjedavajući Općinskog vijeća: „Ja sam zaključio diskusiju vezano za amandmane i niko nije tražio da se izjašnjava po amandmanima.“

Emira Karić, predsjednica kluba vijećnika SDP: „Sada tražim, nakon diskusije.“

Selmin Karić, predsjedavajući Općinskog vijeća: „Sada je završeno.“

Emira Karić, predsjednica kluba vijećnika SDP: „Tačka nije završena.“

Selmin Karić, predsjedavajući Općinskog vijeća: „Nije tačka, ali je diskusija o amandmanima.“

Emira Karić, predsjednica kluba vijećnika SDP: „Mi se ne razumijemo. Diskusija o amandmanima je da li se prihvataju ili ne prihvataju. Shvatili smo da se ne prihvataju amandmani i tražim ...“

Selmin Karić, predsjedavajući Općinskog vijeća: „Načelnik nije prihvatio, a od vas niko nije tražio da se izjašnjava.“

Emira Karić, predsjednica kluba vijećnika SDP: „Evo tražim.“

Selmin Karić, predsjedavajući Općinskog vijeća: „Ne možete vi tražiti kada vi hoćete.“

Emira Karić, predsjednica kluba vijećnika SDP: „Ne tražim kada hoću, nije ovo tačka Program rada Općinskog vijeća, ovo je tačka prijedlog Budžeta. Nakon diskusije ovo se traži, ne mogu u toku diskusije. U toku diskusije mi diskutujemo da li je amandman dobar ili nije. Vi ste ga odbili i ja nakon diskusije tražim da se koristi član 117.“

Selmin Karić, predsjedavajući Općinskog vijeća: „Ne možete u pola rasprave tražiti izjašnjavanje.“

Emira Karić, predsjednica kluba vijećnika SDP: „Ne mogu ni u pola rasprave o amandmanima.“

Selmin Karić, predsjedavajući Općinskog vijeća: „Završeno je i nemojte da sada pravimo lakrdiju od Vijeća. Omere, izvoli.“

Omer Hadžić, sekretar općine: „Pošto se prvi puta javljam sve vas pozdravljam. O amandmanima se ne raspravlja, raspravlja se o tački dnevnog reda, ali vi ste počeli jednim drugim praviti replike. Već je dat budžet na raspravu i sada se raspravlja i diskutuje o tome, da ste tražili prije diskusije o budžetu, onda bi bilo u redu.“

Kemal Bratić, općinski načelnik: „Ja ću pričati o budžetu i kao što svi znamo svaki budžet se predlaže na osnovu projekcije. Mi smo ga radili na osnovu projekcije kantonalnog i federalnog ministarstva finansija, na osnovu saglasnosti koju smo dobili i na osnovu priliva sredstava u budžet općine Doboj Istok

za 11 mjeseci ove tekuće godine. Da li će biti još nekog odstupanja kada se bude usvajalo izvršenje, ja tačno ne znam, ali gledali smo da otprilike ne bude nekog značajnog odstupanja do 31.12. Ono što je bitno reći, a već su neki rekli znači kada suma novca raste onda se i apetiti povećavaju. Opravdano je da smo otprilike osnovu povećali za jedan mali dio, jer smo bili općine koja je imala najmanju osnovu na Kantonu i evo usaglasili smo sa sindikatom, znači to je cirka nekih 20.000 KM povećanja. Znači kada se poveća osnova i ono što je takođe problem, što ja stalno govorim, dolazi do velike razlike između državnih službenika i namještenika. Po meni to se može regulisati ili popraviti koeficijentom i na tome sindikat treba da radi i da se bori za izmjenu koeficijenata. Ako ste pratili vidjeli ste da je kantonalna Skupština na zadnjoj skupštini tek uskladila i koeficijente i osnovu na osnovu federalnog zakona. Bili su naravno dužni davno, ali to je neki dan urađeno. Mi smo to davno uradili, pa znate imali smo tamo probleme sa prijašnjim sindikatom i tužbe, koje smo na svu sreću većinom dobili. Čak smo i naplatili određena sredstva povodom tih tužbi. Neko je pomenuo ovdje za sport i još neka druga uvećanja, vjerovatno je to za sport malo. Znači njima malo, a nama puno i mi ćemo to povećavati i u narednom periodu i treba povećavati i treba podržavati sve ono što je dobro. Mislim da je to možda najbitnija stavka u koju trebamo ulagati, pored ovih stipendija. Juče sam imao priliku da izvršim prijem za našu hafizu, doktoricu, našu sugrađanku, koja je dika i ponos za sve nas. Znači u te stvari trebamo što više ulagati. Kada se radi o transparentnosti, mi smo već do sada u ovoj godini za iduću godinu aplicirali negdje između 10 – 15 projekata. Ne može se tačno reći gdje će ići određena sredstva i ja ne znam ko to može tačno reći. Kada apliciramo, ne znamo hoće li nam odobriti. Zamislite da neko stavi tamo u narativni dio, koji neko traži da bude, bit će uloženo tu, a nama se taj projekat ne odobri. Znači to je mač sa dvije oštrice. Zato nema tog narativnog dijela, a ne da to neko nešto krije ili da neko nešto mulja. To mi ne pada pamet, niti je ikada palo, niti će ikada padati. Ko to može sada da kaže, aplicirao sam na 15 projekata, bit će mi odobreno ovih 10, ne može niko, pogotovo u ovoj situaciji kakva jeste, pogotovo gledajući federalni i kantonalni dio. Evo u januaru će premijer da dođe ovdje u našu općinu sa vladom, ugovorili smo neki dan, pa ćemo vidjeti, jer ne može ni on obećati šta će dati Doboj Istoku. Znači nema ga ko može, niti ja mogu reći bit će 100% urađeno u nekoj mjesnoj zajednici na području naše općine. Kada se radi o povećanju prihoda u budžetu, ja odgovorno tvrdim da je 2021. godina bolja od 2019. godine. Nekada sam govorio da je to najbolja godina, ali mislim da je ova 2021. godina premašila i 2019. godinu. O 2020. godini neću da govorim, svi znate kakva je bila, ali smo opet na neki način dobro prošli. Nismo se zadužili, nismo nikome dužni i to je ono na šta sam ja ponosan, a i vi treba da budete. Znači, nismo nikome dužni, nije nas niko tužio, nije nam niko blokirao račun i nemamo kredita. Da li je dobro što nema kredita, možda ćemo ga imati. Neko je već to napomenuo prije mene, znači možda ćemo imati za neku krupniju investiciju za koju bih se odlučio kao načelnik da vam predložim kreditno zaduženje. Možda je trebalo nekada prije da to bude, ali ne bih sada razmišljao o tome, ali o tom potom, je svi mi imamo pravo na svoje mišljenje i na svoje stavove, a samim tim i na donošenje odluka. Ja smatram da mi svi ovdje zajedno možemo ostvariti predloženi budžetu, znači one prihode, a kada se ostvare prihodi onda je lahko to rasporediti po kontima kako je i planirano u budžetu. Da li će svi glasati za budžet? Ja bih volio da svi glasaju za budžet, ali to nije pod moranje. Znam, recimo, da će Emira glasati. Znači ja sam ovdje bio jasan i mislim da svi ovi vaši prijedlozi, koji su bili u vidu amandmana, da nisu neizvodljivi i da će ih biti 95% ostvarivo. Molim vijećnika Skopljka, Senadu, Emiru i Harisa da me razumiju, da me shvate, neću stopirati ni jedan projekat. Mogao sam to sad uraditi kada je trebalo da idu sredstva od ministarstva, Harise pomozite mi, za poduzetništvo, pa mogao sam stopirati i kada je trebalo za Veliku Brijesnicu, odnosno za Klokotnicu, jer svako traži saglasnost općine, odnosno načelnika. Neću nikada stopirati. Ko god donese ja ću ga poljubiti, ko nađe sredstva. Neću tebe Harise poljubiti. Mislim da i ova današnja sjednica i ove prethodne tačke idu u jednom dobrom pravcu i ja vas pozivam da tako nastavimo, da pomažemo jedni drugima. Skopljaka bih zamolio da mi dostavi programe, članstvo, ciljeve, šta je to cilj naših antifašista i ovih drugih. Izvinjavam se ja se opet vratih na amandmane. Ovaj predloženi budžet je ostvariv, ako Bog da. Zajedničkim snagama ćemo to da uradimo i da uradimo dosta dobrih projekata iduće godine, a evo neke smo započeli i u ovoj. Nije izborna godina, ali mi radimo i kad nisu izbori, borimo se dovlačimo sredstva sa viših nivoa. Ne volimo puno ni da se slikamo i da se hvalimo, jer bitno je da se uradi dio po dio projekata na području cijele općine.“

Emira Karić, predsjednica kluba vijećnika SDP: „Imam pravo na repliku vezano za sekretarovo pojašnjenje. Molim da me saslušaju vijećnici opozicije. Znači prije diskusije o amandmanima, budući da znamo da će 100% biti odbijeni, da tražimo da se član 117. ispoštuje. Isto tako ako se budete medijski oglašavali, amandmane nije odbilo Općinsko vijeće nego Općinski načelnik. Samo da pojasnim.“

Kemal Bratić, općinski načelnik: „ Nisam ja odbio amandmane. Rekao sam da su amandmani dobri, ali da ne ispunjavaju tehničku formu i uslove za koje smatram da bi trebali imati da bi ih ja prihvatio. Ja ne odbijam amandmane, amandmani su dobri. Pozivam vas kada budemo pravili idući budžet ili ako budemo radili rebalans sredinom godine, dođite prije da sjednemo da se dogovorimo i da odmah ugradimo te nekakve stavke, ali da imamo precizne pokazatelje za sve ono što treba da bi odobrili sredstva iz budžeta.“

Mehmed Mehinović, vijećnik SBiH: „ Nisam htio da moja diskusija nikakve tenzije digne, Bože sačuvaj, tako je ne doživljam. Ja hoću da kažem da Vijeće ima još danas priliku da priča o budžetu. Za njega je odgovoran izvršni organ i općinski načelnik, on ga izvršava i postavlja kako treba. Hoće li prihvatiti naše prijedloge i sugestije ili neće ... Ja govorim snagom argumenata za ono što mislim da je dobro. Ja sam pričao kako se budžet donosi, da se donosi na osnovu procjena, na osnovu relevantnih podataka o izvršenju budžeta i na osnovu plana da bude transparentno. Što se tiče kapitalnih izdataka, znamo da ne može i zato se pravi rebalans, svake godine se pravi rebalans. Imam i ja svoje mišljenje o amandmanima, ali bolje da zadržim da ne kažem. Transparentnost sam mislio da bude uporedno, a pitao sam vas za jedno, a mogu da postavim još 5 -6 pitanja. Koliko je povećanje za Općinsko vijeće? Ne znate sigurno. Moraju biti uporedni pokazatelji, da vidimo koliko je rastao određeni trošak i koliko je rastao određeni prihod. Evo da zanemarimo kapitalne izdatke. To je transparentno, a konta idu u knjigovodstvo i oni ubace u ekscelov program i knjiže troškove koji nastaju po određenim kontima. Prema tome ništa zlonamjerno nisam rekao, nego ovo može biti za ubuduće. Ja akceptiram i to su pitanja stalno, pa da se pojasni, jer su ostali troškovi povećani u tekućoj godini za 100.000, a ne znamo zašto su povećani. Recite zašto su povećani? Zašto, da znam i nije problem dignut ću obadvije ruke. Ja nisam uopšte opterećen da ne glasam za nešto zbog političke pripadnosti. Glasat ću za sve što valja. Nikakav nije problem, niti mi može ko narediti de glasaj ovako ili onako. Kapitalni izdaci, ja znam da je to veresija i znam da ne može niko obećati i poznato mi je to. Može biti i više i šta ćemo ako bude više, praviti ćemo rebalans, a ako je i manje praviti ćemo rebalans. Prema tome ja sam mislio na troškove koji su redovni, za koliko radnika se pravi plata, koliko je zaposleno, jer to je uvijek u budžetu bilo. Sa tog aspekta sam govorio o budžetu, jer on je suštinski dobar i ne može tu niko pera odbiti. Vjerujte da je dobar, samo tvrdim ti podaci ja bih želio da znam, da ja ne računam. Ja sam na jednu stranu stavio rebalans, a na jednu budžet, pa sve troškove, pa sve prihode, pa da vidim koliko je to povećanje, a koliko smanjenje. To je ogroman posao, pa se zagubiš, a ima se i godina, naravno. Iz tih je razoga i ne bih volio da se dižu tenzije, jer nema razloga.“

Selmin Karić, predsjedavajući Općinskog vijeća: „Kada je u pitanju ovaj dio ja se slažem da je ranije bilo, ali mislim da je to stvar aplikacije koja je trenutno takva kakva jest. Vjerovatno to tako zahtijevaju viši nivoi vlasti i mi moramo tako postupati. Naravno da bi bilo lakše nama pripremiti sjednicu, ali tako je kako je i moramo se prilagođavati kako nam viši nivoi naredi ili zahtijevaju. Po mom mišljenju prihodi i rashodi su realno planirani u iznosu od 4.339.867 KM, a uzimajući u obzir izvršenje budžeta za prvih devet mjeseci tekuće godine i naravno projekciju prihoda sa viših nivoa i potporu, kao i Strateški plan lokalnog razvoja općine Doboj Istok za period 2021- 2027. godina. Nacrt je prošao kroz javnu raspravu i moje je mišljenje da su se stekli uslovi i da je budžet izuzetno dobar za usvajanje. Ima li još prijavljenih? Nema. Dajem tačku na glasanje. Ko je za usvajanje Prijedloga Budžeta općine Doboj Istok za 2022. godinu?

Glasanje: ZA – 10, PROTIV – 0, SUZDRŽANIH – 6 (Zerina Subašić je odsutna).

Konstatujem da je Prijednog Budžeta dobio potrebnu većinu.“

8. Razmatranje i usvajanje Prijedloga Odluke o izvršenju Budžeta općine Doboj Istok za 2022. godinu

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 16, PROTIV – 0, SUZDRŽANIH – 0 (Zerina Subašić je odsutna).

9. Razmatranje i usvajanje Prijedloga Programa rada Općinskog vijeća Doboj Istok za 2022. godinu,

Selmin Karić, predsjedavajući Općinskog vijeća: „Dobili smo amandman od vijećnika Hasana Hasančevića, a vezano je za razmatranje izvještaja savjeta mjesnih zajednica.“

Hasan Hasančević, predsjednik kluba vijećnika SDA: „Ako se sjećate prilikom prošlog razmatranja izvještaja svi smo komentarisali da to treba da bude u martu zbog finansijskih izvještaja. Ja sam pokušavao da to bude ispravak tehničke greške, međutim kažu da je bolje da uložim amandman. Amandman je zbog toga samo.“

Haris Sinanović, vijećnik SDP: „Samo jedna konstatacija. Mislim da ni ovaj amandman nije ispravan.“

Hasan Hasančević, predsjednik kluba vijećnika SDA: „Kada baš hoćemo, ovo je primjer. Znači nisam magistar, nisam doktor nauka, nisam u prosvjeti, ali ovako se, uvaženi kolega Sinanoviću, piše amandman. Imat ćeš ga za primjer za ubuduće pošto se ja više neću baviti politikom poslije ovog Vijeća, ako to narod ne odluči drugačije. Ovo je primjer kako se piše ispravno amandman.“

Haris Sinanović, vijećnik SDP: „Replika. Nisam ništa rekao vezano za tekst amandmana. Amandmani koji su odbijeni u vezi budžeta, na isti način da se ovaj amandman odbije. Ovdje piše vijećnik SDA.“

Selmin Karić, predsjedavajući Općinskog vijeća: „Zaključujem diskusiju. S obzirom da je predlagač Kolegij, ja dajem na izjašnjavaње ovaj amandman. Ko je za usvajanje ovog amandmana?

Glasanje: ZA – 15, PROTIV – 0, SUZDRŽANIH – 1 (Zerina Subašić je odsutna).

Konstatujem da je amandman dobio potrebnu većinu i postaje sastavni dio Programa rada Općinskog vijeća za 2022. godinu. Dajem Program rada na diskusiju.“

Emira Karić, predsjednica kluba vijećnika SDP: „Znači imamo prijedlog Programa rada Općinskog vijeća za 2022. godinu. Ovdje piše predsjedavajući Općinskog vijeća, a ne Kolegij, znači nismo se pravilno očitovali po amandmanu i nije trebao Kolegij, nego predsjedavajući Općinskog vijeća. Znači ovaj amandman ne može biti usvojen, jer je zbog formalno pravne procedure prekršen. Znači da je ovdje pisalo Kolegij, onda bi to bilo dobro. Ja sam glasala da bih izašla i da prođe taj dio. Znači ovaj amandman se ne može usvojiti, jer ste se pred govornicom trebali očitovati kao predsjedavajući, jer ovdje piše vaše ime i da kažete da usvajate amandman ili ga ne usvajate, a onda bi išlo na Općinsko vijeće. Mogu li sada o Programu?“

Selmin Karić, predsjedavajući Općinskog vijeća: „Mi smo glasali o amandmanu i amandman je usvojen. Omere, izvoli.“

Omer Hadžić, sekretar općine: „To je Prijedlog Programa rada i kada se usvoji predsjedavajući potpisuje Program, kao i sve akte Vijeća. Zato njegovo ime i stoji, a drugo je predlagač.“

Hasan Hasančević, predsjednik kluba vijećnika SDA: „De da oborimo Program rada Vijeća. Ako želite da ga oborimo, šta je sporno? Nema Programa Vijeće i šta je sporno?“

Senada Džanić, predsjednica kluba vijećnika SBB, BPS Sefer Halilović i SBiH: „Mi smo na jednoj od prethodnih sjednica dotakli se tačke vezane za rad komisija. Vidim da nije bilo kvoruma i može se desiti kada je u pitanju rad Komisije za budžet, finansije, privredu i dijasporu. Ja sam ovom prilikom htjela skrenuti pažnju da sam mišljenja da su sve komisije važne, međutim kada je u pitanju ova komisija smatram da je jako bitno da tu sjede oni koji hoće da rade i da su sposobni, jer se na ovom polju može uraditi puno više. Kada govorimo o dijaspori evo imamo lijep primjer iz Grapske, koja nam je ovdje u blizini, na koji način oni to rade i da odaju priznanje našoj dijaspori. Ne možemo nikako zanemariti finansijska sredstva koja dolaze na osnovu njih na općinu, a pogotovo bilo bi lijepo da ih uvažimo kao takve. Mislim da bi ova komisija između ostalog trebala u narednom nekom periodu, a moj prijedlog je sa Općinskim vijećem, da razmatra šta da mi uradimo. Jedan od uslova, nadam se da će biti, da se realizuje naš dom kulture pretvoren u kulturni centar, pa da kroz dane dijaspore i našim građanima i tim građanima koji dolaze pružimo mnogo više.“

Emira Karić, predsjednica kluba vijećnika SDP: „Povukla sam se na svoje mjesto da bih saslušala našeg sekretara, neko pravno objašnjenje. Ja nisam zadovoljna sa tim pravnim objašnjenjem i vratit ću se na Kolegij. Znači, moji prijedlozi na Kolegiju vezani za komisije, za avgustovsku sjednicu su odbijeni i nisu ušli u ovaj akt, odnosno u ovaj Program rada. Ono što se na Kolegiju prihvati, već uđe, pa se predloži na samoj sjednici. Ako se ulaže amandman mora se neko očitovati po amandmanu i ako ste vi predstavnik

Kolegija i predstavnik Vijeća, znači vi ste predsjedavajući, trebali reći da li se prihvata amandman kolege Hasana i samim tim traži poziv na član 117. Poslovnika o radu.“

Selmin Karić, predsjedavajući Općinskog vijeća: „Kolegice, ne mogu ja umjesto Kolegija odlučivati.“

Emira Karić, predsjednica kluba vijećnika SDP: „Ne može se ovdje Kolegij očitovati, jer nas je više na Kolegiju. Znači više od jednog, a i načelniku pomažu službe, pa opet tamo piše općinski načelnik.“

Selmin Karić, predsjedavajući Općinskog vijeća: „Na svakom ovom dokumentu, kolegice, je moj potpis. Znači, ja sam se trebao o svakom amandmanu očitovati po tom vašem tumačenju.“

Kemal Bratić, općinski načelnik: „Mislim da smo imali kvalitetan Kolegij Općinskog vijeća kada smo razmatrali ovu tačku dnevnog reda i po meni je ovaj Program rada Općinskog vijeća izuzetno dobar. Moram reći iskreno da je kod nas u Općinskom vijeću zbilja dobra atmosfera bez obzira kako ko glasao. Kada se poredi i vidi negdje na internetu ponašanje i tok sjednice u nekim drugim općinskim vijećima, ja vam na tome čestitam, jer ipak tu ima i uvažavanja i poštovanja. Mislim da će to, ako Bog da, u narednom periodu biti još bolje i još kvalitetnije. Program rada je dobar i ako se ne izjašnjavam želim da kažem da ga podržavam. Mislim da naše Vijeće kvalitetno radi i da ponaosob, pogotovo naše Vijeće, je sastavljeno od mladih ljudi i ovih iskusnih koji to zajedničkim snagama pripremaju, rade i realizuju. Kada se radi o ovim komisijama od kako znam za sebe mi pričamo o tim komisijama. Evo nismo imali kvorum za ovu komisiju, koja je među tri najbitnije komisije koje ima Općinsko vijeće, znači Komisija za budžet i finansije. Kada se radi o ovoj komisiji koja u sebi ima naziv i dijaspora, ja moram reći da sam odbio jedan poziv, evo priznajem da sam pogriješio, jer sam bio pozvan da od 16. novembra do 29. novembra idem u gradove gdje ima naših građana. Znači ne samo u Njemačku, preko onog centra koji se zove mreža za dijasporu. Priznajem da sam pogriješio, trebao sam otići makar na 5 – 6 dana, ali bilo mi je to puno, jer bilo je posla. Razlog zbog kojih sam odbio su upravo neke druge obaveze koje nisam mogao odlagati i da odem na to. Ono što mi je drago, iz onih informacija koje ja imam, da je atmosfera dobra. Meni je malo ružno i nemojte da me neko krivo shvati, nemojte da ih zovemo dijaspora, jer to su naši građani koji žive tamo privremeno. Ja vjerujem da je njima svima u srcu Bosna i Hercegovina više nego u dosta ljudi koji žive u Bosni i Hercegovini. Znači kontaktiram sa njima tako da znam kakvo je stanje. Pozivam sve predsjednike klubova kada se radi o ovim komisijama nemojte da Vijeće vodi o tom računu, dajte vi razgovarajte sa svojim članovima hoće li dolaziti, hoće li raditi i hoće li davati inicijative. Ne mogu ni ja, jer znači svaki predsjednik kluba da uzme tamo listing od tehničkog osoblja Vijeća i da vidi ko mu je u kojoj komisiji, da provjeri da li on hoće da radi ili neće. Ukoliko neće zamijeniti ga brate dragi, jer Vijeće je izabralo i Vijeće može i zamijeniti. Čestitam, pošto ćete vjerovatno danas usvojiti ovaj Program rada za narednu godinu koji je po meni dobar. Bez obzira bio ovaj amandman ili ne, Kolegij se može i poslije izjasniti da se to razdvoji kao što i do sada radio u nekim prilikama.“

Selmin Karić, predsjedavajući Općinskog vijeća: „Ima li još prijavljenih? Nema. Ko je za usvajanje Programa rada Općinskog vijeća za 2022. godinu?“

Glasanje: ZA – 16, PROTIV – 0, SUZDRŽANIH – 0 (Zerina Subašić je odsutna).

10. Razmatranje i usvajanje Programa i plana rada Općinskog načelnika za 2022. godinu.

Selmin Karić, predsjedavajući Općinskog vijeća: „Tačku dajem na diskusiju. Ima li još prijavljenih? Nema. Ko je za usvajanje Programa i plana rada Općinskog načelnika za 2022. godinu?“

Glasanje: ZA – 16, PROTIV – 0, SUZDRŽANIH – 0 (Zerina Subašić je odsutna).

Ovim smo iscrpili dnevni red. Zahvaljujem vam se na prisustvu sjednici i želim vam sretnu Novi godinu, puno zdravlja, sreće i berićeta.“

Sjednica je završena u 12,30 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVALA
OPĆINSKOG VIJEĆA
Selmin Karić

Službena zabilješka:

Zapisnik je usvojen na 13. redovnoj sjednici Općinskog vijeća Doboj Istok održanoj dana 27.01.2022. godine.

U Klokotnici, dana 27.01.2022. godine

*Zabilješku sačinio
Omer Hadžić, sekretar Općine*